

Naalakkersuisunut apequt: Atuisut pisortanut akiitsuisa akilersornissaannut piffissarlu ungasinnerusoq isigalugu appartinnissaannut qanoq iliortoqarniarpa.

(Inatsisartunut ilaasortaq Naaja Nathanielsen, IA)

Akissuteqaat

(Aningaasaqarnermut Naalakkersuisoq)

Pisortanut akiitsut akilersornissaannut appartinnissaannullu qanoq iliortoqarnissaanik Inatsisartunut ilaasortap Naaja Nathanielsenip IA-meersup apeqqutaanut qujanarlunga akiliisitsiniartarnerup tungaatigut massakkut atukkanut naatsumik nassuiaateqarniarpunga, pingaartumik siumut sammisumik suliniutissat eqqarsaatigalugit.

Massakkut ukiut marluk qaangiupput pisortat pissaannik tamarmiusunik akiliisitsiniartarnerup qitiusumik aqunneqalernissaa pillugu aalajangerneq atortussanngortinneqarmat, isumaqarluinnarpungalu Akileraartarnermut Aqutsisoqarfimmi “Qiusumik Akiliisitsiniartarfik”-p pissusissamisut sulinissani ilikkarsimassagaa akiliisitsiniartarnerlu naammaginatsumik aqussinnaalerlugu.

Akileraarutinit A-nut akiitsut qaffakkaluttuinnartut ukioq ataaseq qaangiummat takusimasavut unikaallatsinneqarput akiitsullu malunnartumik appartinneqarlutik, naallu akerlianik oqartoqartaraluartoq kommunitut annikinngitsumik

Eqqartuussisarnermut inatsit nutaaq ukiut nikiinneranni atortussanngortitaq pisortanullu akiitsut akilersinniartarnerat pinaveersaartinnerilu pillugit inatsit atorlugit Akiliisitsiniarnermut Oqartussat atortussatik akiliisitsiniarnermut atorsinnaasatik pigilerpaat.

Taakku saniatigut Naalakkersuisut eqqartuussisarnermut inatsimmut nutaamut atasumik nalunaarummik suliaqarlutik aallartitsipput ingerlatseqatigiiffiit pisortanut akiitsoqartut pisortat oqartussaasuinut akiliisitsiniartarnerup sukkanerusumik pisariinnerusumillu ingerlattalernissaat periarfissaqartinniarlugu.

Taamatulli oqaatigalunga imaattumik ajornartorsiuteqarpugut, pisortat Namminersorlutik Oqartussat kommunillu aqutigalugit innuttaasunit, ingerlatseqatigiiffinniit allaniillu 1 milliardit sinnerlugit pissaqarmata.

Taamaattorli malugineqassaaq akiitsut tamakku taamaattuaannanngimmata, akiitsut pisoqqat akilersinneqartarput nutaallu takkuttuarterlutik, tamatumanilu pingaarnermik akileraarutit A-t pineqarput.

Taamaakkaluartoq aamma akileqquneqartunik takkuttoqartarpoq assut akilersikkuminaatsunik.

Tamatumani pingaarnertut pineqarput meeqqanut akilersuutit siumoortumik tunniunneqarsimasunit kommunit pissaat 210 mio. kr.-nit missaanniittut kiisalu boligstøttemit erhversstøttemiillu taarsigassarsianut katillugit 200 mio. kr.-nit missaanniittunut Namminersorlutik Oqartussanut akiligassat.

Akilersuutitut kommunit akiitsut ukiorpassuit ingerlaneranni amerliartorsimapput tamannalu aamma Nunani Avannarlerni allani takuneqarsinnaasutut ippoq, tamatumunngalu pissutaavoq akilersuutitut akiliisussaataasut akiliisussaannerminnut aningaasatigut periarfissaqanngimmata.

Aningaasat taakku ilarpassui qaquguluunniit akilerneqarnaviangillat, inatsisinili aalajangersakkani periarfissaqarpoq innuttaasut akiliisinnaassuseqanngitsut kinguartitsinissamik qinnuteqarsinnaatillugit kingusinnerusukkullu isumakkeerfigineqarlutik, taamaaliornikkut akiitsut atorunnaarsinneqassammata.

Tamatumani ilaatigut aamma ESU aamma BSU pillugit Namminersorlutik Oqartussat pissaat pineqarput, taarsigassarsiat tamakku taamani – inatsisitigut akuerineqarlutik – inuussutissarsiornikkut politikikkullu suliniutit siuarsarnissaannut tunniunneqarsimammata., kisiannili taarsigassarsiat tunniunneqarneranniilli ilisimasimallugu taarsigassarsiat ilaat qaquumulluunniit taarserneqarnaviangitsut.

Taamaammat Naalakkersuisut isumaat malillugu pisariaqassaaq – pingitsaaliissummik akiliisitsiniartarneq nalinginnaasoq saniatigut soorunami ingerlatiinnarlugu – akiitsut nutaat pilernissaasa pinngitsoortinniarnissaat.

Taamaammat Naalakkersuisut misissornialerpaat pisortat sullissinerisa ingerlanneqarneranni assersuutigalugu akiliinissamut kiffartuussivimmut ilanngunnissap piumasaqaataanissaa inatsisitigut tunngavilerneqarsinnaanersoq.

Suliniut taamaattoq kommunit pingaarnermik pingaaruteqassaaq, taamaaliornikkut annertunerusumik qulakkeerneqassammat pujoorfinnik saliinernut, anartarfilerinernut aamma ulloq unnuarlu paaqqinnittarfinnut akiliutissanut akiliisitsiniutit akilersinniarnissaannut ilanngunneqarneri.

Peqataanik suliniut taamaattoq innuttaasunut kommunit karsiini utaqqinissamik pisariaqartitsiunnaartussanut imaluunniit bankini allakkerisarfinniluunniit akiliinermut akiliuteqartarnissaasa pisariaqarunnaarnissaanut iluaqutaasussatut isigineqarpoq.

Akiliinissamut kiffartuussinissamik periuseq aningaasartuuteqarnerunermik kinguneqarsinnaavoq, kisiannilu taakku taarserneqarsinnaassapput pisariillisakkamik allaffissornerup ingerlaneratigut akiitsullu appasinnerulernissaasigut.

Taamaammat Naalakkersuisut Inatsisartut ukiakkut ataatsimiinnissaanni tamatuma tungaatigut saqqummiussaqaarnissaat suliniutigissavara, peqataanillu siunnersuutininik isumassarsianillu Inatsisartut ilaasortaannit allaneersunik ammallunga.